



**Sud Bosne i Hercegovine**  
**Суд Босне и Херцеговине**

---

**Broj; S1 3 Iž 037692 20 Iž**  
**Sarajevo; 19.10.2020.godine**

Sud Bosne i Hercegovine, u drugostepenom vijeću sastavljenom od sudija Dinke Bešlagić Čovrk kao predsjednika vijeća, Vesne Trifunović i Zvezdane Antonović kao članova vijeća, odlučujući o žalbi političke stranke SNSD Savez nezavisnih socijaldemokrata Opštinski odbor Šamac koja osporava odluke Centralne izborne komisije Bosne i Hercegovine, broj: 05-1-07-1-997/20 od 01.10.2020. godine, o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na nejavnoj sjednici održanoj dana 19.10.2020. godine donio je

**R J E Š E N J E**

Žalba se odbacuje kao nedozvoljena.

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu, utvrđen je i objavljen broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine.

Ovu odluku pobija SNSD Savez nezavisnih socijaldemokrata žalbom koju je podnio Opštinski odbor Šamac u kojoj navodi da se na spisku glasača prijavljenih za glasanje poštom u izbornoj jedinici Šamac nalazi šest lica sa istim imenom i prezimenom što ne odgovara popisu birača sa biračkih mjesta. Nadalje navodi da se na listi za glasanje putem pošte nalaze dva lica koja su preminula, te traže da se ove nepravilnosti u pogledu registracije pojedinih birača otklone.

Centralna izborna komisija Bosne i Hercegovine dostavila je ovom sudu odgovor na žalbu u kojem je istakla da žalba nije dopuštena i da je izjavljena od neovlaštenog lica. Žalba je izjavljena na odluku čiji sastavni dio je tabelarni prikaz sa ukupnim brojem registrovanih birača za glasanje izvan BiH po opštinama. Žalitelj nije priložio ovlaštenje svoje političke stranke da u njeno ime može ulagati žalbu na odluke Centralne izborne komisije BiH, jer to pravo imaju samo politički subjekti po odredbama člana 6.2 stav 1 Izbornog Zakona BiH ukoliko je povrijeđeno njihovo

pravo ustanovljeno tim zakonom. Nadalje, žalitelj nije dostavio punomoć niti od jednog registrovanog birača navedenog u žalbi da u njihovo ime izjavi žalbu na pobijanu odluku i stoga predlaže da se žalba odbaci.

Žalitelj kao politička partija pobija Odluku Centralne izborne komisije BiH o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine. Dakle, odluka se odnosi na pojedinačno pravo svakog građanina BiH koji je upisan u Centralni izborni spisak, a privremeno živi u inostranstvu, da u skladu sa članom 3.15 Izbornog zakona BiH, ostvari svoje biračko pravo na način što će biti upisan u izvod iz Centralnog biračkog spiska za glasanje van BiH.

Ožalbena odluka ne proizvodi pravne posljedice na prava političkih stranaka utvrđena Izbornim zakonom BiH i stoga nisu ispunjeni uslovi da žalilac ostvari zaštitu izbornog prava u smislu člana 6.2 stav 1 citiranog zakona, niti pravo da podnošenjem izborne žalbe u smislu člana 6.9 ostvari pravo na sudsku zaštitu.

Iz navedenih razloga žalba je nedopuštena, niti je žalilac ovlašten za podnošenje žalbe odredbama člana 78 Zakona o upravnom sporu BiH, jer nema pravnog interesa za pobijanje odluke koja ne povrijeđuje njegova prava utvrđena Izbornim zakonom.

Potrebno je istaći da Zakon o upravnom sporu BiH, čije se odredbe primjenjuju u postupku po izbornim žalbama, u članu 80 stav 1 propisuju da žalbu potpisuje predsjednik ili ovlašteni predstavnik političke stranke. Ova odredba nije u koliziji sa članom 30 Statuta Saveza nezavisnih socijaldemokrata koji propisuje da političku stranku predstavlja i zastupa predsjednik. U konkretnom slučaju žalba je potpisana od strane predsjednika opštinskog odbora Šamac, međutim nije tražena naknadna saglasnost predsjednika stranke, jer ista ne bi uticala na drugačije rješenje pošto žalba nije dopuštena iz razloga navedenih u obrazloženju ove odluke. Budući da iz sadržaja žalbe proizilazi da je izjavljena u ime političke stranke, nema značaja rasprava o postojanju ovlaštenja lica navedenih u žalbi za njeno podnošenje.

Iz navedenih razloga apelaciono vijeće zaključilo je da žalba nedopuštena u smislu člana 180 stav 3 Zakona o parničnom postupku pred Sudom BiH (Sl. glasnik BiH br. 36/04 sa izmjenama). Stoga je primjenom odredbe člana 191 stav 1 tačka 1 citiranog zakona žalba odbačena, odredbe kojeg zakona se shodno primjenjuju kako je to propisano članom 60 a) Zakona o upravnim sporovima Bosne i Hercegovine (Sl. glasnik BiH broj 19/02 do 83/08).

**PREDSJEDNIK VIJEĆA  
S U D I J A**

**Dinka Bešlagić Čovrk**